

## **42. KEIPANG'AKI YESU ILAITENG'ENAK LENYE, ENKILEPATA E YESU**

**Luka 24:36-53**

Ore ejoito iloiteng'eni le Yesu imbaa o ilalashera oing'uaa Emmaus, neitashe Yesu makewan ti atua ninche, nejoki, "Entaseriana!" Kake eirriang'a ninche, neureishoyu, ejo koloip etoduaa. Nejoki Yesu ninche, "Ainyoo pee inyamalala? Naa kaji etiu pee etii olng'ash iltauja linyi? Eng'ora nkaik aainei o nkejek nchere kewan ai nanu ele; embung'aki pee idolidolo; amu meeta enkiyang'et nkiri o loik anaa kulo lidolitata aata." Ore pee ejoki neijia, netoidol nkaik enyena o nkejek. Ore eton ake meiruk te nkaraki eng'ida e nking'asia nejoki ninche, "latata tene toki nanyae?" Neisho embelati o sinkirri oyiera, nedumu nyena te dukuya ninche.

Nejoki ninche, "Ilapa rorei laainei kulo latiaaka intae, eton atii te nevo intae, inchere ore mbaa pooki naatisiraki aaipirta nanu too nkitanapat e Musa o too loibonok le Nkai o to Lkerempe le Nkai, meeta nchere meitabari. Nebol iltauja lenye metayiololo ilkigerot, nejoki ninche, "Etisiraki aajo, keitamei Kristo naa ore te nkolong' e uni nepiu aing'uaa lootuata, naa te nkarna enye elikiori enkirridunoto o empalakinoto oo ng'ok loo loreren pooki, neiteruni te Yerusalem. Irara intae shakeni le kuna baa. Naa ng'ura, kairriwaki intae ilo otejo Papa keisho intae; kake entotoni te na anasa, o meishopokini intae engolon naing'uaa shumata."

Neitoki arik o metabaiki Betania, neilepie nkaik enyena nemayian. Ore emayianita ninye ninche, neilep aing'uaa ninche. Nerrinyo ninche aapuo Yerusalem te ng'ida sapuk, netii anaa ake enkaji e Nkai eisisita Enkai.

### **ENKIPANGATA E NKISOMA**

**ENE DUKUYA:** Inkilikuana ena kilikuanata eton eitu iliki enkatini

- Kainyioo tipatisho pee kias kipaaretisho arashu aita ilkulikae ilkipaareta le Yesu?

**ENKATINI:** Toliki enkatini ningiligili tenebo anaa olturrur pee eyiolo pooki ng'ae

**INKIKILIKUANAT NAIMAKINI TENEBU:** Taasishore kuna kilikuanat pee irororie tenebo enaikununo enkatini

**KAINYIOO KINTENG'ENA ENA ATINI NAIPIRTA ENKAI?**

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
  - o Neipang'aki ilkipaareta lenye tiatua olgilata oikeno. Etapiuo aing'uaa enkeeya to sesen lenye. Neitodol ina ina kata.
  - o Neipang'aki iltung'ana kumok eidipa atopiuo.
  - o Neibelekeny iltauja loo lkipaareta lenya. Netum ninche enchipai sapuk.
- **Kaji eiko teneitodolu ena atini nchere keyiolo Enkai (Yesu) pooki toki?**
  - o Neyiolo Yesu ilng'ashi lenye neiyiolo sii aitagolo ninche. Neyiolo ajo ore Enkiyang'et Sinyati naa aidim aishoo ninche engolon.
  - o Neyiolo sii ajo lasim neing'uaa ninche. Neyiolo sii kaa naasayu too nkolong'i naapuonu.
  - o Neyiolo Ororei le Nkai oleng' neidim aishoo eutaroto enaikununo pooki tooki nataase.
  - o Neyiolo sii ajo keisho Enkiyang'et sinyati ilkipaareta engolon pee eaku ilshakenini lenyena.

- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neiro o ltungana)**
  - o Neing'aki ilkipaareta oshal oturia ooata ilng'ashi kumok pee eitagol ninche. Keng'iri ninye oleng'neliki pooki tooki temboron pee etum eseriani.
  - o Nemayian ilkipaareta lenye eton eitu elo keper.

**KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)**

- o Ata hoo ilkipaareta, iltung'ana otobiko oleng' o Yesu, neshal oleng' neata sii apa ilng'ashi kumok. Nemeidim aitaaju ate. Neiyieu Yesu aitagol ate.
- o Ore eidipa Yesu aipang'aki ilkipaareta neitagol ninche, neata ninche enchipai sapuk neaku tayari aisiaia Ninye.
- o Keidimayu enjeunoto tenkaraki enkeeya o mpiunoto e Yesu ake. Metii ai oitoi.
- o Neasishore Enkai iloiteng'eni lenye anaa ilshakenini lenye pee elikoo iloshon enaikunono enkirridunoto o empalakinoo oo ng'ok.

**INKIKILIKUANAT NIKIASISHORE TE NKIBELEKENYATA E NKISHUI:** (Tegelu enkilikuanata nabo arashu aare niindim aiteng'enayu.)

- Amaa kulie katitin keidimany teniata ilng'ash anaa apa ilkipaareta le Yesu? Keidimayu teniata olng'ash enaikunono enyorrata Enkai te iyie arashu engolon ake tiatua enkishui ino? Amaa ina tinin, keidim kintagolo pee isiaia Enkai?
- Amaa, inoto ai kata enkirridunoto o empalakinoto e Kristo tiatua enkishui ino? Itaa tayari pee iaku olshakeni lenye pooki wueji kipikie Enkai iyie? Amaa igira alikoo ilchoretta linono enaikunono enyorrata Enkai tiatua Yesu?